



№26 (10016)
2 сәуір,
сейсенбі
2024 жыл

Жалағаш жаршысы



«zhalagash-zharshysy.kz»
ақпараттық аземіміз

Аудандық қоғамдық-саяси газет

Газет 1934 жылдың 10 қаңтарынан бастап шығады

Мезгіл мәселесі



Тілсіз жауға тоқтам бола ма?

Қар еріп, көктем келді деп қуанғанымыз сол еді, еліміздің 11 өңірінде су тасып, 7 облыста төтенше жағдай жарияланды. Әсіресе Батыс пен орталықта, Қостанай, Ақмола, Абай облыстарында жағдай қиын. Үйі суған батқан халық амалсыз ауылын тастап, қауіпсіз аймаққа бас сауғалап қашса, төрт түлік тасқыннан аман қалмай, ағып кетіп жатыр. Зардап шеккендерге кім және қалай жәрдем беріп жатыр. Тарқатайық...

Аймақтарда ахуал мез емес

Президент Қасым-Жомарт Тоқаев еліміздің бірқатар өңірінде болған су тасқыны салдарынан туындаған төтенше жағдайға байланысты шұғыл кеңес өткізді. Жиынға премьер-министрден бастап жоғарғы атқарушы билік өкілдері қатысты. Кеңесте мемлекет басшысы тасқынға қамданбаған жауаптыларға қатаң сөгіс жариялады. Алайда мәселе сөгіс жариялаумен ғана шектелмей, салаға жүйелі өзгеріс енгізілсе игі.

Елдің әр өңіріндегі азаматтар өлі де шыбын жанын шүберекке түйіп отыр. Өйткені су басу қаупі сөйлемей тұр. Тасқын 26 наурызда Батыс Қазақстан облысында басталды. Аймақта бүгінге дейін 460 үй мен 26 ғимарат су астында қалған. Аймақта апат басталғанына 6 күн. Қауіп өлі сөйлемеді. Мұнда жолды су бұзып өткендіктен 17 елді-мекенмен келік қатынасы үзілген. Өңірдегі 2 мыңнан астам адам

қауіпсіз жерге көшірілген. Ал аймақтың Орал қаласы мен 4 ауданында төтенше жағдай жарияланған.

Тасқынмен апта бойы арпалысып жатқан тағы бір өңір – Ақтөбе. Мұнда 753 үй мен 10 әлеуметтік нысан суға кеткен. Одан бөлек, 187 аула мен 99 саяжай зақымданған. Облыс аумағындағы 20 елді-мекенге жол жоқ. Еріген қар суы салдарынан Ақтөбе әуежайы уақытша жабылды.

Ақтөбе облысында да 10 өзеннің тасуы салдарынан 5 аудан мен Ақтөбе қаласында төтенше жағдай жарияланған. Қазір әсіресе Ойыл ауданында жағдай қиын. Кеше Берсиев, Қоғалы ауылдарының тұрғындары көшірілген. Енді Бірғыз ауданындағы 4 ауылға қауіп төніп тұр. Су ортасында қалған аудандардан тұрғындарды тікұшақпен қауіпсіз аймақтарға көшіруде. Қызыл су қоғамдық көліктердің де ішіне толып кеткен.

ЖАЛҒАСЫ 2-БЕТТЕ.

Аймақ жаңалықтары

Байқоңырдан ғарыш кемесі ұшты

Соңғы бір айда «Байқоңыр» ғарыш алаңынан екі ғарыштық ұшырылым жүзеге асырылды. Кеше сағат 14.36-да ғарыш алаңының №31 алаңынан №4 Жерді қашықтықтан зондтау «Ресурс-П» ғарыш кемесі бар «Союз-2.1б» зымыран тасымалдағышы ұшырылды.



Роскосмос телестудиясы мамандарының ұшыру алаңынан жүргізген тікелей эфирі 13 сағат 50 минутта басталып, ғарыш кемесі орбитаға шыққанға дейін жүргізілді. Ұшыру қалыпты режимде өтіп, зымыран тасымалдағыштың сатыларын бөлу белгіленген уақытта жүзеге асырылды және ұшырылғаннан кейін 10 минуттан соң ғарыш кемесі Жер орбитасына шығарылды.

Ресейлік Жерді қашықтықтан зондтау спутнигі планетамыздың табиғи ресурстарын зерттейді, қоршаған ортаның ластануын бақылайды, пайдалы қазбалардың кен орындарын іздейді, мұз жағдайын және төтенше жағдайларды бақылайды.

Пияз 3 есе арзандады

Қызылордада базар мен дүкендерде пияздың келісі 80 теңгеден басталады. Ал азық-түлікті тұрақтандыру қорының әлеуметтік сауда нүктелерінде 30 теңгеден сатылып жатыр. Себебі қазан айынан бері қоймада сақталған пияз күрт жылыған кезде бұзылып кетуі мүмкін.



Былытыр 120 тонна көкөніс жарамсыз болып, қоқысқа тасталды. Қазір тұрақтандыру қорында 400 тоннаға жуық пияз қалған.

Аудандар өзінің жол көліктерінің шығынын есептегенде 45-50 теңгеге барып қалуы мүмкін. Ал қала бойынша барлық нүктесінде, сауда үйлерінде, базарларда 30 теңгеден өзімізге тиісті әлеуметтік магазиндер арқылы сатып жатырмыз. Күніне осы тұрақтандыру қорының өзінен 3 тоннаға дейін жуа шығады, – дейді тұрақтандыру қорының басқарма басшысы Мейрамбек Серікбай.

«ЖЖ» ақпарат

Бәрекедді!



Жалағаштықтар топ жарған жарыс

Алматыдан ақжолтай хабар! 21-23 наурыз аралығында өткен жеңіл атлетикадан ел біріншілігінде жалағаштық саңлақтар аймақ қоржынына 2 алтын, 1 күміс салды. Оларды салада 20 жылдан астам тәжірибесі бар білікті бапкер Жандос Қарақұлов дайындаған.

Иә, аудандағы №13 олимпиадалық резервтің мамандандырылған балалар мен жасөспірімдер мектебінің оқушылары бұған дейін де талай тартысты бәсекелерде жүлделі орындардан көрінген болатын. Ондағы мамандардың аудан спортының алға басыуына қажырлы еңбек етіп жатқанын осыдан-ақ аңғару қиын емес. Қазақстан чемпионатында аймақтың абыройын асқақтатқан іні-қарындастарымыз да осындағы білікті бапкерден тәжірибе мен өзіндік спортқа деген ептілігі мұның бәрін елемеді. Дүбірлі додада жалағаштық Сезім Шығамбай 30,84 метрге найза лақтырып, аймақ қоржынына алтын салды. Мұнан кейінгі орындарға Шымкент қаласы мен Түркістан облысынан келген спортшылар жайғасқан.

Мына қызықты қараңыз, №201 мектеп-лицейінің оқушысы Нұрзат Ғалымұлының жеңіл атлетикамен айналысқанына 1 жыл да болмаған. Осы ретте

Жәкеңнің де еңбегін ерекше атап өткеніңіз айыбы болмас. Себебі аз ғана уақытта қарапайым мектеп оқушысынан ел біріншілігінде топ жаратын спортшы қалыптастыру – кәсіп бапкердің ғана қолынан келетін іс. Нұрзат бұл додада 49,21 метрге найза лақтырып, аймақ қоржынындағы алтынды қатарын еселеді. Мұнан кейінгі орынға жайғасқан түркістандық саңлақ жерлесімізден 10 метр қалып қойған. Былытыр ол да ел біріншілігінде өзінен үлкендермен сынга түскен. Онда күміс алған жерлесіміз биыл қатарластарымен қайта сынга түсіп, күмісті алтына алмастырды.

Аймақ қоржынындағы медалдарды еселеген саңлақтар қатарында Зейнолла Жарқынбаев атындағы №202 орта мектеп оқушысы Балнұра Қалнияз да бар. Ол найза лақтыруда екінші орынға жайғасып, күміс медалға ие болды. Дәл осы жарыста көш бастаған спортшы қарындасымыздан небәрі 1 метр айырмашылықпен алға шығып отыр. Осы ретте жалағаштық жеңімпаз алдағы тартысты бәсекелерде алтын алады деп сенім білдірдік.

Мектеп түлегі биыл спорт саласы бойынша жоғары оқу орындарының бірінде білімін жетілдіріп, өлі де тәжірибе шыңдайтынын айтады. Оны бапкері Жандос Қарақұлов та қос қолдап қолдап отыр. Себебі шәкіртінен өзі сияқты білікті бапкер шығатынына сенеді.

Айта кетейік, негізінен жеңіл атлетикаға ел біріншілігіне Жәкең 5 шәкіртің қосқан. Оның үшеуі жеңіс туғырынан көрініп отыр. Бұл додада одан бөлек Қармақшы ауданынан 12, Қызылорда қаласынан да бірнеше спортшы қатысқан болатын. Аймақ намысын қорғаған 30-дан астам спортшының ішінде жалағаштық саңлақтар ғана облыс қоржынына алтын салған. Мұнан бөлек қармақшылық 1 спортшы қола алса, қызылордалық 2 спортшы күміс медалға ие болған.

Жеңіл атлетика десе, жалағаштықтардың есіне бірінші Мақсат Қарақұлов ағамыздың есімі түседі. Иә, оның ауданда спорттың бұл түріне еңбегі сіңгенін ешкім жоққа шығара алмайды. Жәкең – сол Мақсат ағамыздың баласы. Кезі тірлігінде атпал азамат ауыл-ауылды аралап, балаларды спортқа баулығаны бар-ды. Жәкең де дәл сондай, қазіргі таңда оның үйірінде Аққұм, Таң, Ақсу ауылдарынан келіп жаттығатын балалар бар. Бар мақсаты – солардан байрақты бәсекелерде еліміздің абыройын асқақтатар спортшылар қалыптастыру.

Бүгінде аудандағы №13 олимпиадалық резервтің мамандандырылған балалар мен жасөспірімдер мектебінің «Жеңіл атлетика» үйірмесінде 30-дан астам бала жаттығады. Қазір олардың өркісісінің жетістігін сараласақ, өз

алдына бір еңбекке жүк болары анық. Солардың ішінде Серік Расул қысқа қашықтыққа жүгіруден облыста соңғы 3 жылда алдына жан салмаған. Ел біріншіліктерінде де бірнеше рет ақтық мәреде өнер көрсеткен.

Білікті бапкер жеңіс туғырынан көрінетін шәкірт тәрбиелеуде тек тәжірибе азық ететінін айтады. Олар бірінші кезекте ата-ананың рұқсатын алады. Келіспеген жағдайда оның үлкен кедергі екенін де жоққа шығармады.

– Мықты балалар болады, бірақ олардың кейбірінің ата-анасы оның үйірімеге баруына рұқсат бере бермейді. Осының өзі біздің мықты спортшы қалыптастыруымызға үлкен кедергі болады. Сондықтан бірінші кезекте бізге ата-ананың келісімі маңызды. Жетістігі көп басқа да шәкірттер бар. Алдағы уақытта олардың тәжірибесін өлі де шыңдауға жұмыс жасаймыз. Себебі бүгін жеңіс бар екен деп тоқ-мәйлесуге тағы болмайды. Менің түсінігімде спортшы кез келген уақытта тыңшылықты дайындықта болуы керек. Себебі ешқандай жеңіс оңайлықпен келмейді, – дейді Жандос Қарақұлов.

Алматыдағы атой салған жалағаштық іні-қарындастарымызды алда үлкен жарыстар күтіп тұр. Қазір олар жазғы ел біріншілігіне қызу дайындық үстінде. Одан бөлек басқа да жарыстарға кімдер қатысады? Күңделікті дайындық барысында кәсіп бапкер осы сауалдың түйінін тарқатады.

Кенжетай ҚАЙРАҚБАЕВ

